

навести на Еупатия множество пороков, и начаша бити по нем; и едва убиша крепкорукаго и дерзосердаго и лвояростнаго Еупатия. И принесоша его мертва ко царю Батыю. Он же видев его и дивився с князи своими храбрости его и мужеству. И повеле тело его отдати оставльшей дружине его, которые на том бою поиманы. И повеле их отпустить, и ничим вредити. Окаянный же Батый еще воздвижеса воевати, и взяша 14 градов, и поидоша татарове к Юрьеву, и к Ростову, а инии идоша к Переславлю, и к Кашину,^а а инии к Ярославлю, и к Угличу, а инии на Волгу, на Кострому, и на Плесо, и на Юрьевецъ, и на Городец. И вся грады плениша по Волзе и до Галича. Ини же от Переславля поидоша к Снятину, и ко Твери, и вся поплениша^б даже и до Торжику, никому же возбраняющу им.

О пришествии князя Ингоря на Рязань

Князь же Игорь Ингоревич в то время был в Чернигове у брата своего у князя Михаила Всеволодича^в Черниговскаго, — тамо бо соблюде его богу от злаго отметника и от врага христианскаго Батыя. И в то время прииде во град Рязань, и виде град разорен, и прочия грады разорены,^г и пожжены, и виде мать свою, и снохи своя, и прочия сродники своя, и всех людей множество побито, и град разорен, и церкви пожжены, и инокиня и девицы осквернена, и побита, и плачяся зело и плач велий. И едва отдохну душа в нем, и повеле мать свою великую княгиню Агрипену Ростиславу и снохи своя погребсти со псалмы и песнми прозбитером, которых бог соблюде, сам стоя и плачяся жалостно. И очисти град, и церкви освати, и собращася к нему людие, и даде им малое утешение. И плачяся безпрестани^д поминая^е мать свою и братию, и род свой, яко вси вскоре погибоша. Потом же поиде князь Ингорь Ингоревич по братию свою, иде побиты от нечестиваго царя Батыя: и виде братию свою, и мнози князи, и местныи, и бояре, и воеводы, и все воинство рязанское побиены, лежаще на земли пусте, на траве ковыле, снегом и ледом померзъше, никим же брегоми, точию от зверей телеса их снедаемы, и от множества птиц растерзаемы. Вси убо купно лежаще мертви, едину чашу смертную пиша. И видев же сия Ингорь Ингоревичю и воскрича горким и великим гласом, яко труба распалаюся и в перси бия, и ударяюся о землю. Слезы же его, яко струю течаху и жалостная словеса приглашаше. И нача разбирати трупия мертвых, и обрете братию свою Ингоревичев: великаго князя Георгия Рязансково и князя Давида Муромскаго, и князя Глеба Коломенскаго.

^а Переправлено из Княшичю.

^б В рук.: поплениа.

^в В рук.: Всеволодича.

^г В рук.: разориша.

^д В рук.: без стани.

^е В рук.: поминаю.